



15 №

сора 31 лун

2015 во

Нюммунам Ыль лунлы!

Шонді петом. Кутшом мича серпас! Еджыд, лоз, кольквич... Быттьо став дзоридзыс сетома ассыс мичсö тайö здукуыслы. Сöмын думыштöй!..

Гожом. Сикт. Водз асыв. Ставыс узыö на... Петан ывлаö. Апыштан морос тыр сөдз сынöдсö — чöскыд. Лолавсö кокниа. Тувччан турун вылас — синва кодь сөстөм лысваыс небыдика мыськö коктö...

Лөнъ. Весиг төвру абу. Пуяс чöv олöны, ни öти кор оз шыась...

А вот и шонді садьмис — нюммунис ыль лунлы, нюжмасыштис, гусьöника видзöддис син пöвнас, а ссэся ньöжйö заводитис кыссыны вöртас сайсянь. Здук кежлö сувтлис. Том ныв моз видзöдчыштис рөмпöштан-ваас, мичмöдчыштис, а ссэся нюмъялг-тыр малыштис шоньд югөръяснас чужöмтö. Видзöддис сөстөм, кельыдлöз енэж-ёрт вылас, малыштис медбөръяыс ва веркөссö да водзö мöдöдчис аслас туйöд.

Александра ФИЛИППОВА.

Снимокыс Евгений КОЗЛОВАÖН.



Чарушинаса лабич

Ми петім керкаысь, мунім йөрөдыс пес сарай дорө. Карпа дед восьтіс өдзөссө. Тані вөлі дзонь мастерскөй! Пессө, буракө, дыр нин абу видзлөмаось: кузь джаджъясын куйліс быдсяма инструмент. Кызвыныс меным вөлі төдтөм. Джоджас стен пөлөныс сулаліс некымын ящик. Ме понді видзөдавны найөс, а Карпа дед ветліс сарай пельөсас да вайис сэтысь пөвтор.

— Ме тэныд вөча самолёт-бергач.

— А мый сійө сэтшөмыс?

— Вөча да, адзылан.

Сійө пуксис ыджыд пу чурка вылө, босьтіс киас пурт. Читкыртчөмөн видзөдыштис пөвтор вылас да пондіс «кимөститчыны». Джоджө пондісны киссьыны зарни чагыяс. Ме шемөсмөмөн кыйөдчи сылөн удж бөрся. Вочасөн пөвтор пөрис самолётө.

Карпа дед кутіс зіля шылөдны-мольөдны дась чачасө. Сэсся вөчис бантик кодь пропеллер, розьөдіс шылаөн шөрсө да тувъяліс вөсни көрт тувйөн самолёт нырө, но колис неыджыд кост, мед вермис бергавны. Сэсся пуктіс чачасө верстак вылө да розьөдіс дрельөн дзык шөрөдыс.

— Со и ставыс! — мышсө веськөдөмөн шуис Карпа дед. — Босьт. Кажитчө?

— Да! — ме куті киам тайө дивөсө и эг вермы вештыны сы вылысь синмөс.

— А өні кывзы, — велөдөмөн висьталіс Карпа дед. — Кор тэныд дышөдас чачаыд, шу батыды, мед тувъялас самолёттө майөг помө. Кузь көрт тувйөн буретш тайө розяс. А майөгсө крепитас гид весьтас. Сэки самолётыд бергачөн лоас, төв кутас петкөдлыны.

— Кыдзи? — чуйми ме.

— Тайө самолётыс аслыспөлөс, век пондас лэбны сэтчань, кысянь пөльтө төлыс. Шуам, лэбө кө шонді чеччанінлань, сідзкө, төлыс асыввыв, пуксянінланыс кө — рытыввыв. Карлань — лунвыв, а шойналань — войвыв. Он вунөд?

— Ог.

— Но, мун ворс сэсся. Да воны на коркө.

Киын дона козин топөдөмөн триньксөді гортө. А төлысь мысти самолёт тэрыба жургис миян гид весьтын чеччысь шонділы паныд лэбөмөн.

Сійө кадсянныс, кор Чарушинаын лоис лабич, колис кык воысь унджык. Ме ветлөдді нин мөд классө.

Октябрся өти лунө Карпа дедлы вайисны машинаөн сиктсөветысь корөм пес додь. Мөд луннас дед кыпыд руөн асывсянныс петіс поткөдлыны чукөрөн куйлысь кыз пу чуркаяс. Клава баблөн буретш няньшомыс кыптис, и сійө босьтчис пөжавны верөсыслысь радейтана пувъя пирөгъяс. Клава баб перйис нин банийштөм пөжассө, а ывласянь век на кыліс поткөдчан шыыс.

— Одзөма кодкө! — майшасьөмөн броткыштис баб да довкйөдыштис юрнас. Сюйис пачө нөшта өти көрт лист, чышкыштис пызьөссьөм кисө водздөраас да петіс ывлаө.

— Шойччыштнытө он көйы? — кильчө вывсаянь шыасис верөс дорас.

— Час! — бергөдчис сылань Карпа дед. Уджысла чужөмыс гөрдөдөма, а синмыс югзьө. — Поткөдчышта на!

— Ачыд төдан. А пирөгъыд пачысь петіс нин! — видліс ылөдны верөссө гортас. Но Карпа дед бара нин лэптіс черсө. Клава баб өвтыштис кинас да бөр мөдіс пач дорас. Мөд пөв пирөгъяссө перйөм бөрын нин юрас воис, мый поткөдчан шыыс оз кыв.

— Слабог, өвсөма! — кокныда ышловзис баб. — Шуа көть, мед чипассө оз тэч. Асьсө өд оз жалит. — Тайө мөвпнас петіс керкасыс да измис: пес-чаг тыра муын кымыньөн куйліс Карпа дед киас крепыда топөдөм черөн.

Бөрыннас бурдөдысьясянь Клава баб төдмаліс: верөсылөн висьмөма сьөлөмыс... Меным бура колис вежөрө Карпа дедөс дзедан луныс. Йөзыс котырөн-котырөн пыравлісны прөщайтчыны бур сьөлөма тешкодь морткөд. Кодьяскө сулалісны йөрас поткөдлөм пес дорын, кодьяскө горт петкөдөм виччысиг-моз видзөдалісны серөдөм өшиньсө. А ми мамкөд да некымын нывбабакөд пукалім сьөд пучера нинпу-ясдорса лабич вылын.

— Со и эз ло миян чача вөчысьыд... — гажтөма кайтыштис Марпа тьөт. Буретш сэки керкаысь

петкөдiсны турунвиж рөмөн мавтөм көрт листысь памятник. Сы вылысь ме лыдди: «Чарушин Карп Емельянович». Улынджык сьөдөн пасйөма олан вояссö: 1902-1978. Тадзи ме первойысь тöдмалi Карпа деддысь тыр нимсö.

— Мам, а Карпа дедлөн овыс дзик мян сикт да ю нимыс кодь, — шемöсмöмөн кыскыштi сийöс сойöдыс.

Мамöй довкнитiс юрнас, а Марпа тьöt бергöдчис мелань да гусьöник шуис:

— Да, Николушка, сийö öд татчöс. Чарушинаса. Шойна вылас и дедыс, и прадедыс куйлöны. Батыс абу-а. Война дырйи лы ни ку вошис.

Шойнаöдз туйыс нуöдiс мян керка дортi. Пöльтiс паныд төв, и пельöдз воис тöдса таркöдчан шы. Ме бергöдчи да видзöдлi самолёт-бергач вылö. Сийö легышталiс төв ныр йылын и зiлис вöтчыны мян бöрся, медем прöщайтчыны сийöс вöчыськöд...

Колисны вояс. Николка Сомовысь ме быдми Николай Семёновичöдз, обласът газетса уджалысьöдз. Гöтраси, пиöс быдта.

Но воис лун, кор дум вылам усис Чарушина грезд, и дыр эг вермы пöдтыны ылыстчöм челядьдырысь гажтöмтчöмöс.

Юнь тöлысся лунö ме чеччи автобусысь да тöдса уличаöд мöдi мян важся керка местаö. Кыркöтш улын тэрмасьтöм Чаруша петкöдлiс аслас рөмпöштанын берегдорса юсьпöлян. Öнi юыс меным чайтсис ляпкыдөн. Ме сьöкыдпырысь тöдмалi грездсö. Вежөрö кольöм пу керкаяс пыдди аддзи öти пöлөс кык судтаа коттеджъяс йöраныс öтджуджда шырöм турунөн.

Но виччысьтөг ме сувтi. Видзöдласöй сибдiс пöрысьмöм пуяслөн гартчöм увъясö. Тайö вöлины Карпа дедлөн нинпуяс. На дорö котöртiгөн нин казялi лабичсö. Сылысь. Чарушинасаöс.

Челядьдырйи моз чеччысь сьöлөмөн ме пукси лабич помö. Кадысла сийö воймöма, косьмöмысла костасьлöма. Мян ни Карпа дедлөн керкаыс эз овны тайö аддзысьлөмöдзыс. И сöмын нинпуясдорса лабичсö кольöма кадыс, ме видзны шань чача вöчысь йылысь казытылөм. Сьöлөм вылын вöлi и югыд, и гажтöм.

Пом.

Сетöма дженьгöгöмөн.

Комиöгiс Алёна ШОМЫСОВА.

Мозын ю дорӧ, Вашка ю дорӧ
Мортлӧн нэм кежлӧ сибгӧма лов.
Удора, тэ менам Удора,
Йӧзлы шуг вылӧ дзоригзӧн ов.
(Юрий Васютов)

Вунӧдны поэтӧм гаж

Ме шензя, кутшӧм паськыд мян Коми муным! Нимкодяся сылӧн мичлунӧн да сэтчӧс олысь, весь-кыда кӧ шуны, енбиа йӧзӧн. Мен мойвиис таво ветлыны гижысьяскӧд, учёнйяскӧд, телевидениеын да радиоын уджалысьяскӧд «Коми книга» гаж вылӧ. Збыль, шеньзьӧмлы помыс абу. А вочаалӧмыс кутшӧм пӧсь! Няньӧн-солӧн паныдалісны, вежа ваӧн весиг резісны.

Небӧг лэдзӧм йылысь зэв кывкутана сёрнисянь пансис Кослан сиктын аддзысьлӧм. «Гӧгрӧс пызан» сайын казтылісны, кыдзи кучик-сюмӧд вылын гижӧдъясьыс чужис небӧг, кымын бурсӧ сійӧ вайис йӧзлы, мӧвпалісны небӧглӧн аския лун йылысь. Кадыс петкӧдлас, поэть-ӧ кутны лача ӧтуввез вылӧ. Гижӧда кыв бырӧдӧм — сійӧ думыштӧмтор. Ӧд небӧглы доныс абу. Чукӧртчысьяс индісны, мый челялядылы небӧгыс петӧ этша, а петӧ кӧ, оз во ичӧтъяслӧн киӧ, разалӧ сӧмын библиотекаясӧ да школаясӧ. Ыджыд мытшӧдӧн шуисны сӧм чуктӧдӧм. Эскам, мый воӧдчасны ӧти кывйӧ коми войтыр да на вӧсна кывкутысьяс.

Водзӧ туйным вайӧдіс Усогорскӧ да Благоевӧ. Тайӧ посёлокъяссӧ уна во сайын кыпӧдісны Болгариясь йӧз. Болгаралысь оласног, дерт, мян йӧз эз босытны, но накӧд лои топыд йитӧд.

Унакӧд тӧдмасы «Коми книга» гаж вылын: ставлы тӧдса Надежда Мирошниченкокӧд да Нина Обрезковакӧд, матысянь аддзылі Альфия Коротаеваӧс, кодӧ сылӧ, этша вылӧ, куим кыв вылын. Сыктыв-карын том коми гижысьяслӧн котырӧн юрнуӧдӧ Удораысь петӧм Елена Афанасьева, мян туйдысь-велӧдысь, кывбуралысь да висытьяс гижысь. Сылӧн поэзияыс ставнас йитчӧма Вукӧд да сэтчӧс дона йӧзкӧд, кывбуръясас кылан ичӧт Чужанін дорӧ муслун:

Ме вои аслам ӧзынӧ.

А тэ тэрмасын визувтны водзӧ,

Мег кодлӧнкӧ ӧзынӧ пуктыны мӧвп да кыв.

(Е. Афанасьевалӧн «Ву» кывбурьыс)

Коми кыв дорӧ муслун абу кусӧма Коми мулӧн ни ӧти пельӧсын. Ме тӧда, сійӧс радейтӧны Кулӧм-дінын, Емдінын, а ӧні аддза, и Удораын — Ву, Мозын, Путшкым юяс пӧлӧн сиктыясн.

Аттӧ гажсӧ котыртысьяслы да нуӧдысьяслы, удораса йӧзлы да гӧсьтысьяслы! Найӧ ӧтвылысь козьна-лісны меным вунӧдны поэтӧм гаж. Юргисны сыланкывъяс и кывбуръяс, а Йӧртымдінын весиг мойвиис видзӧдны нималана гижысь Галина Бутыревалӧн олан туй серти лӧсьӧдӧм спектакль. Синваыд матын, и серамыд! Тайӧ радлунӧн тырӧм лунъясыс ышӧдӧны бурӧ, чуксалӧны, сетӧны лача гижны. Ӧні на син водзын вӧрыс, сиктыясыс, юяслӧн сольнитчӧм, Путшкым да Ву.

Унатор вылӧ видзӧдлас вежсьӧ бур йӧзӧс аддзывлігӧн, кодъясьлы абу веськодъ коми оласног, коми кыв. Кыдзи козъя пемыд парма-вӧр бӧрын пыравлан кыддза раскӧ, кӧн еджыдыс вералӧ вичкоын моз, сэтшӧмӧн и лоисны менам Удораса гожся лунъясыс. Муӧдз копыр Удора мулы!

Татьяна ШАХОВА.

Снимокъясыс Алёна ШОМЫСОВАЛӦН.



Вашкаса слабудкаяс.



Галина Бутырева тѡдмѡдѡ выль небѡгѡн.



«Видза олан, Пушкымгін!»

Быдтам вай коми ныв-пиянос!

Ме, коми сиктысь петӧм ныв, вежджык сёрнита комиӧн: сикт-сакӧд, гортсакӧд, уджвывсакӧд. Казытывсьӧ, бать-мамкӧд весиг рочӧн сёрнитан лунъяс котыртлім, мед карын, рочьяс пӧвстын, эгӧ шӧйӧвошӧй. Чужан кывйӧс помтӧг радейта. Студенталигӧн эг ӧтдортчы сысь — быдлаын, лавкаын ли улич вылын, сёрнитӧ комиӧн. Та вӧсна некор эг вермы мӧвпыштны, мый аслам челядьӧй рочмасын!


Дас во сайын чужис пи, сӧсся ныв. Рузума кадсянь сёрнитӧ накӧд дзик комиӧн. Тӧдсаяс повзӧдлӧны вӧлі — садикас пӧ оз кутны гӧгӧрвоны кагульничаясӧс да челядьӧс. Ме сӧмын сералӧ на вылын, кӧть и повзылікодъ: друг збыльтор висьталӧны. Вочасӧн воис детсадыӧ мунан кад. Ӗдйӧ тай и велалісны роч кывъяд. Садикад сідз сӧмын и швачкӧны рочӧн, гортӧ локтӧны — рочасьӧны жӧ. Ме, йӧй юрӧн, налы рочӧн жӧ вочавидзи. Кытчӧ воштылі саддьӧс? Ог тӧд! Эг и казавлы, кыз челядьыд менам дзикӧдз рочмисны. Коми кывтӧ гежӧда шулісны, а во-мӧд мысти и ньӧти эг кут кывны. Роч кывйыд тай ӧдйӧ пысасьӧ вежӧрад — он мын сӧсся сысь.

Аттӧ, ӧти луӧ кодкӧ быттӧ юрӧ кучкис — ӧвсьы, Микулай Ӗльӧн, мый нӧ тэ керан? Став бать-мамыс кӧ кутасны ныв-пияныскӧд рочасьны, вояс мысти комиӧн сёрнитысьыс бырас! Тайӧ дзик гӧгӧрвоанатор. Шуам, гӧтрисис коми ныв ли коми зон, чужтіс кагукӧс да кутіс сыкӧд рочасьны, сідзкӧ, тайӧ котырас коми кывлы воис пом! Мӧд котырын тадз, дай коймӧдын... Видзӧдлыны кӧ менам тӧдсаяс пийсь, дас том гозъясьыс витыс челядьныскӧд рочасьӧны. Кытысь та бӧрын сӧ во мысти босытчас комиыс?! Некысь оз! Школаын да ашӧра кыв велӧдӧм оз сет тырвыйӧ коми мортсӧ. Оз позь, мед пӧль-пӧчсянь кыссьысь комилуныс кытӧкӧ орис. Оз позь! И ставыс миян, том йӧз, сайын!

И кор ме тайӧс гӧгӧрвои, шӧйӧвоши, повзи. Босытчи ас котырӧ, но сёр нин. Челядь кӧть и тӧдісны коми кывсӧ, эз сёрнитны. Тэ налы комиӧн шуан — найӧ рочӧн. Во-мӧд колис да, аттӧ, кыкысьсӧ дас пийсь вочавидзасны жӧ комиӧн. Но акцентныс! Юръяндзим. Дерт, водзӧ и водзӧ кута накӧд уджавны. Коми гимназияӧ кыкнаннысӧ сеті. Но тайӧ нокыс эз эськӧ ковмы, ме кӧ водзті эг лэдз вӧжжисӧ да эг сет поэзалун, медводз аслым, рочасьны челядькӧд.

Ӗні менам чужис коймӧд кагук. Дерт, ме сыкӧд ог рочась. Олӧмыс велӧдіс. Чайта, Ӗньӧ Миш быдмас чужан му да чужан кыв радейтысь мортӧн. Ме кӧйыси та йылысь аслым. Но мый вӧчны Максимкӧд да Аннушкӧд? Уджавны, а сідзкӧ, лыддысьны комиӧн, сёрнитны комиӧн... Мӧдарни оз позь!

Мыйла ме тайӧс ставсӧ гига ас йылысь? Ме кӧсья, мед тэ, том морт, эн сконъясь ме моз, эн кеж коми кывсӧ пыдди пуктӧмысь. Ме тӧда, мый тэнад вояс мысти чужас кагук, да тэ, дерт жӧ, пуктан став вынтӧ, мед сійӧ быдмис сюсь, шань, вежӧра мортӧн. А медшӧрыс, козыналан сылы меддонаторсӧ — чужан кыв!



Мом йӧзы

Коми йӧз, мый нӧ ті керанныд?
Пӧльяслысь оласног неранныд!
Юр вывсянь кок улӧдз рочманныд,
Лунысь-лун быранныд-шочманныд.

Серпасыс «Радужка» школа-студияын велӧдчысь Татьяна САВЧУКЛӦН.

Мыйла нӧ асланыд пиянад
Кыв дінӧ муслунсӧ вианныд?
Он накӧд сёрнитӧй комиӧн,
Кытчӧдз ми тадзитӧ воамӧй?

Збыль ӧмӧй Коми му выланым
Рочъясӧн асьнытӧ кыланныд?
Абу нин кольӧма яндзимныд,
Кокныд тай петан туй аддзӧмныд!

Воӧй бӧр ас саяд, донаяс.
Ставӧн ми Парма йӧз, комияс.
Ачымӧс кора и тӧянӧс —
Быдтам вай коми ныв-пиянӧс!



Рочасьысь Кӧч

Оліс-выліс Кӧч. Гожӧмнас рӧмыс руд, тӧвнас — еджыд. Войвывса пемӧс. Коми кывйӧн сёрнитӧ. Но ӧтчыл сійӧ паныдасис шоныд муясысь воӧм Руд Кӧчкӧд да сысянь рочӧн сёрнитны неуна веладыштӧс. И быгтьӧ прамӧймис миян Кӧчным, мукӧддырйи и нырсӧ на вылӧ лӧптало!

— Чолӧм, Кӧчиль! Кытчӧ нин мӧдін? — юасьӧ комиӧн Руч.

А Кӧчыл воча рочасьӧ:

— Я просто так гуляю! Вот так!

Ручыл Кӧчтӧ эз гӧгӧрво, чуймӧмпырысь кыйкнитліс руд гӧна вылӧ, да и бокӧ кежис, аслас туйӧд муніс.

А Кӧч водзӧ тапйӧ. Паныдасис Ошкӧд.

— Чолӧм, кузь пель! — шуӧ Ошкыл. А мӧдыс бара рочасьӧ, мыйкӧ ас ногыс вомгорулас сёрнитӧ. Чуймис Ош, ышловзис, лапанас ӧвтыштӧс да водзӧ муніс.

— Мыйкӧ талун мекӧд некод сёрнитны оз кӧсйы, — балябӧжсӧ гыжъялӧ Кӧч. — Мый нӧ лоӧмаӧсь?

Коз улӧ дзевсис. Видзӧдӧ: орчча пу вылын дзормӧм Сюзь пукалӧ. Дыркодъ аслас кӧдзыд синнас Сюзьыл видзӧдіс Кӧч вылӧ, а сӧсся шуис жӧ:

— Мый нӧ рочасян, торксин али мый? Ставсӧ ӧд кывлі! Тэ кӧні олан, еджыд гӧн, он али мый Войвыв пармаын? А тані став звер-пӧткаыс сёрнитӧны комиӧн. Куим кыв кӧ рочӧн тӧдан, ачыл эн на вежсы, и мӧд гӧн тэныд таысь оз пет. Кӧчӧн вӧлін, Кӧчӧн и колян!

Дӧзмис Сюзь вылӧ Кӧчыл и комиӧн шуӧ:

— Кыдзи кӧсья, сідзи и сёрнита! Кужа да! Абу мыжа ме, мый мукӧдыс оз гӧгӧрвоны. Роч кывтӧ дыш налы велӧдны!

Вель дыр Сюзь видзӧдіс Кӧч вылӧ. Сӧсся веськодпырысь шуис:

— Пельыл кузь, а юр вежӧрыд истӧг йыв кузъя. Коді ассъыс чужан кывсӧ мӧд кыв вылӧ вежас? Африкаӧ кӧ тӧнӧ пыбитасны, крокодил либӧ бегемот дорӧ, сӧки быгть велӧдчы на ног сёрнитны, а то сӧясны. А тані тӧнӧ и сідз гӧгӧрвоӧны. Кутан кӧ вывтӧасны — тӧкӧд ставныс дутдасны сёрнитны.

Яндзим лои Кӧчлы. Юрсӧ лӧдзис да Руч дорӧ муніс, шыасис комиӧн:

— Видза олан, Ручӧ-чойӧй!

— Чолӧм, чолӧм, Кӧчиль, — нюммунис Руч.

Корис Кӧч Ошкӧс:

— Чолӧм, Микайлӧ дядь! Кыдзи олан-вылан?

Долыл лои Кӧчлы. Быгтьӧ гӧгӧр югзис. Сӧксянь сӧсся эз нин рочасьлы. Ас чужан кывйыс тырмымӧн вӧлі.



Виктория УЛЯШЕВА,
Кулӧмгін районса
Помӧсгін сикт.

Серпасыс «Радужка» школа-студияын велӧдчыс Лилиана КУРИЛОЛӦН.

Редколлегия:

Елена Афанасьева, Алёна Нестерова,
Екатерина Микушева, Мария Игушева.

